



JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

Komunikadu Imprensa
4 Marsu 2014

Evidensia la-sufiente tribunál absolve arguidu kazu violasaun seksuál

Iha 28 Feveireiru 2014 Tribunál Distritál Suai através hosi tribunál movel prezide leitura akordaun ba kazu krime violasaun seksuál ne'ebé involve arguidu MT hasoru lezada SM, ne'ebé akontese iha Distrito Bobonaro. Bazeia ba faktus ne'ebé produz durante julgamentu tribunál konklui no absolve arguidu, tanba tribunál la hetan evidensia suficiente atu kondena arguidu.

Ministériu Públiku akuza katak iha 2 Abril 2009, lezada ho testemuña nain rua (SM no CM) fila husi fatin kareta bakufila (monu), arguidu hakbesik ba lezada no book lezada. Iha momentu ne'ebá, testamuña sira no lezada dehan arguidu katak la bele tanbá sira sei iha relasaun familia.

Momentu ne'e, arguidu duni testemuña SM no CM dook husi lezada, arguidu hahu kaer lezada nia hirus-matan, rei no kous obrigatoriu lezada ba iha du'ut laran, hatoba no kolu lezada nia ropa no hálo relasaun seksuál ho lezada.

Ministériu Públiku akuza arguidu nu'udar autór material ba krime violásaun seksuál ne'ebé preve iha artigu 285 KUHP Indonesia kónjuga ho artigu 172 Kódigu Penál.

Iha julgamentu arguidu konfesa katak nia hálo duni relasaun seksuál hasoru lezada la'ós obriga, maibe hálo relasaun seksuál ho konsentimentu.

“JSMP hanoin katak tanba prosesu ba kazu ne'e han tempu naruk durante tinan 4 nia laran, bele fo fatin ba lezada lakon vontade no hanoin kona-ba evidensia. Aleinde ne'e, bele mos fo fatin ba arguidu atu influensia lezada atu apresenta faktu ne'ebé la loos iha tribunál, ,” dehan Diretór Ezekutivu JSMP Luis de Oliveira Sampaio.

Testamuña ho inisial SM no CM hato'o depoimentu ba tribunál katak sira la hare akontesimentu ne'e, maibé depoimenta katak arguidu book lezada no duni testamuña sira bainhira fila husi fatin kareta bakufila. Testamuña sira mos depoimenta katak lezada fila ba uma ho kondisaun fuk nakrakat, roupa foer, triste no tanis.

Alegasaun finál Ministériu Públiku bazeia ba konfisaun arguidu nian, deklarasaun lezada no testamuña sira konsidera faktu hotu-hotu provadu no bazeia ba artigu 3 Kódigu Penál nune'e husu ba tribunál atu kondena arguidu ho pena prizaun ne'ebé la aas liu tinan 5.

Entertantu konkluzaun defeza nian konsidera deklarasaun arguidu lezada no testamuña kontrariu nune'e defeza husu ba tribunál atu absolve arguidu husi kazu ne'e.

Antes le'e leitura akordaun, tribunál deklara iha audiénsia katak faktus ne'ebé produz iha julgamentu tribunál konsidera la provadu tanba iha deklarasaun lezada hamosu duvida ba tribunál.

Depois de hálo avaliasaun ba faktus hotu ne'ebé mak produs durante julgamentu, tribunál duvida ho deklarasaun husi lezada, tribunál hasai deklarasaun hodi liberta arguidu husi prizaun preventiva no absolve arguidu.

Kazu ne'e rejista iha tribunál ho Nú. Prosesu 14/PEN/2014/TDS, kompozisaun juis kolektivu kompostu husi Dr. Pedro Raposo (juis internasionál) Dr. Argentino Luiza Nunes (juis estajiáriu) no Dra. Florencia Freitas, Ministériu Públiku representa husi Dr. Antonio Tavarres no arguidu hetan defeza husi Dr. Manuel Amaral husi Defensória Públiku, ofisial justisa ba kazu ne'e Sr. Acasio Ribeiro.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl